

Ady Thijsen

Un politico cu a sa di diferencia su mes den e ultimo temporada den parlamento door di kibra e custumber y tradicion di aproba tur loke ministernan ta bin cune sin mas. E custumber aki a pone cu nos parlamento tabata tilda di ta un 'stempel parlement'. Cu preguntanan critico y al caso pa e ministernan di su propio partido, Juan Edbert 'Ady' Thijsen a mustra cu e por pensa y opina riba su mes, exigiendo claridad den diferente asunto di atencion nacional.

F: Dicon bo a scohe pa studia abogacia?

AT: E ta algo cu bo mester sinti p'e. Na aña '77 pa '78, mi à caba HAVO y n'e mes momento a bira tata na edad hopi jong. C'un yiu pa sosten'e, mi à hayami ta traha na casino. Mi a bay Hulanda pa dos aña y a bolbe pa caba mi VWO y a bolbe bay traha na casino. Despues di esey mi a bay universidad UNA pa studia 'rechten' cu semper mi a gusta, y a keda traha na casino anochi. Mi tabata 'shopsteward' tambe y despues di un problema na casino, nan kier a kita varios di nos compañoeronan. Mi a reclama y pa esey nan a kitami 'op staande voet'. Mi a protesta y nan mester a tumami bek, pero e inhusticia a pone cu mi a specialisa den 'arbeisrecht'. Ya for aña '94, FTA a nami chens como nan 'adviseur'. Asina mi a bira abogado trahando cu John van der Kuyp y cu Max Croes, cu a bira un mentor cu a siñami masha hopi mes. Despues di tempo mi a bay traha hunto cu Harold Falconi.

F: Bo tabata yuda trahadornan den FTA caba. Door di opta pa politica, bo no a bandona e causa di e clase trahador?

AT: E clase trahador ta e masa, cu ta 'draag bij' cu belasting, den esey nan a keda atras. Ami a drenta politica

pasobra nan a puntrami, e motibo tabata pasobra Fredis Refunjol a bira Gobernador y nan tabatin mester di un candidato pa Savaneta, entre varios mi a sali e mihor, pa'mi e ta un honor. Cu tur e consecuencianan cu esey ta trece cune, mi tabata sa cu mi ta bay perde cliente. E prome cliente cu mi a perde tabata FTA, na unda mi a forma mi mes dus cu hopi dolor mi a tuma e perdida ey, pero nos ta sigui lucha pa trahadonan den parlamento.

F: Aunke tabata un custumber cu por a bende tereno erfpacht, bo tabata sa cu Minister Tromp a saca un anuncio bisando cu no mag bende. Apesar cu bo a gana bo caso, no tabata mas correcto pa entrega bo tereno?

AT: E anuncio tabata pa esnan cu no a paga e canon, cual ami si tabatin paga. Mi por dunabo un lista di hopi hende cu a bende tereno erfpacht, e no ta contra ley. Mi no a bende pa haci ganashi, sino pa recupera e gastonan cuantioso ya haci caba y pa un motibo personal cu ta divorcio. Mi por a haya hopi placa pa e tereno ey, pero ganashi no tabata e intencion.

F: Marisol a yama e benta di tereno algo immoral. E hecho cu bo ta existi pa e contesta pregunta, ta pa'bo a

tuma venganza contra dje?

AT: Loke ei a bisa ta keda pa su cuenta, e no tabata na su lugar. Ami a keda semper profesional, nunca mi a atak'e personalmente. Si loke mi a haci cu e tereno ta inormal, tur abogado y notario ta parti di algo inormal, pasobra ta nan ta pasa e aktenan aki tur dia. Na aña 2006 Marisol a sobrepasa su presupuesto, si mi tabata rencoroso, lo mi por a caba cune politicamente. Den politica no ta cuanto sla bo por parti sino cuanto bo por 'incasear'. Den pueblo tabata bisa cu e minister a favorece cierto comerciante. Mi trabou ta pa puntra pa'mi y pa pueblo haya claridad.

F: Si door di haci pregunta, abo ta haci bo trabou, kiermeen e otro 10 parlamentarionan, no ta haci nan trabou?

AT: Ami ta e lider di fraccion, ora e lider haci e pregunta e ta hacie pa e otro nan tambe. Te awe ningun hende den MEP a bisami cu nan no ta para tras di mi preguntanan

F: What about Dirk Dumfries, el a bisa cu bo tin problema financiero of di salud.

AT: Mi ta haya cu loke Dirk a bisa, a hacimi dolor, pasobra e ta un compa-
ñero di partido. El a pasa e grens di

loke ta decente. Wak Dirk no ta biba cumi, dus e no sa si mi por tin problema financiero, ni problema di salud. Dus el a tira un cos hopi leu, personalmente y politicamente. Ami lo no hacie ni cu oposicion. Ami semper "ta speel de bal, niet de man". E ta fastioso, pero nos ta deal cune pasobra bo ta den un causa husto, mi ta sinti cu mi fraccion ta cumi. Di parti di mi famia, nan ta hopi rabia; ami ta dun'e chens pa e coregi su mes.

F: Berdad bo a haya menaza ultimo tempo?

AT: Esey ta berdad y mi a haya sa ta ken. El a bin for di algun hende disgusta den partido, cu a kere cu nunca mi lo haya sa. Tambe menasa a bin di contrincante politico. Tin ora hende ta inocente, nan no ta pensa y nan ta wordo usa pa otro pa haci cos for di sla.

F: Con bo ta haya e nivel di politica?

AT: Mi opinin ta cu nos nivel ta mediocre. Nos mester cuminsa purba yega na otro. Loke mi kiermen ta, ami ta responsabel di mi funcion y abo den dibo, nos por debati tur cos pero cu respet y yega na un conclusion. Loke ami a cuminsa cune no ta algo nobo, e ta algo natural, no ta ami a invente, pero ami a pone atencion riba djé, porta tin hende cu no tin beneficio cu un proceso asina pero nan tin cu biba cune.

F: Tin otro partido a asercabo,
pa purba cambiabo di pensamento
politico, pa join nan?

AT: Hopi, conocemi for di tempo mi ta abogado, sempre mi ta un hende c'un pensamiento hopi habri. Ningun hende no ta bay stop mi di papia cu un of otro hende, si mi kier papia cu Monica, cu Lampe, cu Mike, mi ta hacie, pero no ta pasobra cu Mike of Monica a papia cumi' mi a bira AVP, MPA of "whatever". Mi ta un Mepista pasobra mi ta un sôcial democrata, pasobra mi ta kere den e ideologia. Mi ta kere MEP ta e partido pa a clase trahador y ciudadano humilde. Ta bon pa bo scucha otro, nos mester tin e libertad pa papia cu otro. Kico nos tin en comun cu otro partido? Nos isla.

F: Colega Edwin Jacobs ta bay di politica y tabata pa bira e futuro lider; awor cu e ta bay, abo por bira e siguiente lider?

AT: Mi ta kere hende kier hacibo lider pasobra nan tin e respet pa'bo nan ta identifica cubo y nan ta dispuesto pa bay guerra pa'bo. Tur lider grandi tin carisma y nan tin e sentimento cu abo por logra algo pa nan. Si mi bira un dia lider ta pasobra e lider tin confianza den mi y e votadornan, militancia a scohemi como lider di MEP. Jacobs ta hopi inteligente, e tabatin confiansa di e lider, pero pa un lider politico voto ta conta. Ami ta haya cu Nel mester keda un periodo mas, bo sa pakico, e experiencia cu Nel tin, ni e politiconan na Hulanda tine, e ta un estadista.

F: Si bo por a bira minister di labor awe, cual 3 punto lo bo kier realiza?

AT: Prome cos, un Pacto Social, si nos bin cu un Pacto Social cu e gremionan, lo ta algo grandi, esey mi ta sinti cu falta. Dos, nos tin cu hiba e pais na un nivel mas halto di productividad, conscientia nos hendenan pa produci, pero cu e "fair share" pa cada grupo. Tres, regula e 'arbeidswetgeving' pa e duna seguridad y stabilidad di trabou, e speranza di mehoracion den trabou.

F: Si un comerciante a sponsor
un minister e no ta logico cu e ta
pidie fabor?

AT: Ami sigur ta condena esey, pero acusa ta facil, proba ta e cos. Como abogado mi a siña, no acusa si bo no tin prueba. Pesey ami ta traha cu un fundacion, si un comerciante cumpra 10 buki di bingo, ami no ta haya sa. E comision ta djis bende independiente.

F: Ta acceptabel pa comerciante bishita un minister na cas?

AT: Ami lo no hacie, ora bo ta den un posicion publico bo mester ta hopi cauteloso. Bo no mester crea e 'schijn' rond di bo. Cu tur respet pa bo privacidad pero bo ta keda minister, ami lo no hacie.

Ken ta bo inspiracion den politica?

AT: Promie, Betico Croes nos libertador pa su lucha, su vision y perseverancia y su carisma pa e pueblo. E di dos ta Nel Oduber, pa a traha den tempo dificil den sombra di Betico. Pa MEP Oduber a percura pa el a crece pa 4 gabinete, e merece reconocimientu pa su logronan y su reputacion di ta un hende drechí. E di tres ta Chico Mendes, e tabata un sindicalista, un 'rubbertapper' di amazonia. El a defende e derecho di e indjannan. Nan a purba di soborn'e y menas'e. Ora cu nan a ripara cu nan no por cune, nan a mat'e den su cas. Busca su storia. Mi ta un hende principieel. Mi no kier pa niun hende interpreta mi principionan robez, cu si mi no baha gobierno mi no tin principio, mi no ta haye etico pa un parlamentario dicidi e futuro di un pais asina. **F**

